



## SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka («Službeni glasnik BiH» broj 95/12 i 41/16), člana 25. Pravilnika o godišnjim finansijskim izvještajima političkih stranaka («Službeni glasnik BiH» broj 96/13, 89/16 i 5/22) i člana 18. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08 i 5/22), izdajem

### IZVJEŠTAJ O REVIZIJI GODIŠNJEG FINANSIJSKOG IZVJEŠTAJA ZA 2021. GODINU HRVATSKE REPUBLIKANSKE STRANKE

Broj: 03-07-6-400/22  
Sarajevo, 04.03.2024. godine

## SADRŽAJ

1. UVOD .....	4
2. PREDSTAVLJANJE POLITIČKE STRANKE .....	4
3. OPIS REVIZIJE.....	5
Predmet revizije .....	5
Cilj revizije .....	5
Obim revizije .....	5
4. PRETHODNE KONTROLE I REVIZIJE.....	5
5. NALAZI I PREPORUKE .....	5
5.1 NALAZI.....	5
5.2 PREPORUKE .....	9

## MIŠLJENJE

Služba za reviziju finansiranja političkih stranaka izvršila je reviziju godišnjeg finansijskog izvještaja Hrvatske republikanske stranke za 2021. godinu.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka, te uspostavljanje efikasnog sistema internih kontrola.

Naša odgovornost je da izrazimo mišljenje na osnovu revizije koju smo izvršili.

Reviziju smo izvršili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garanciju da je stranka postupala u skladu sa odredbama Zakona o finansiranju političkih stranaka.

Revizija je na osnovu uzoraka ispitivala značajne transakcije koje potvrđuju iznose u finansijskim izvještajima, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju političkih stranaka.

Smatramo da revizija koju smo izvršili pruža razumnu osnovu za izražavanje našeg mišljenja.

**Revizijom finansijskih izvještaja za 2021. godinu, utvrđeno je da je Hrvatska republikanska stranka prekršila odredbe člana 4. stav (1), člana 11. stav (1) i člana 12. stav (1) i stav (4) Zakona o finansiranju političkih stranaka.**

**Prema našem mišljenju, osim navedenog, revidirani finansijski izvještaji ukazuju da je Hrvatska republikanska stranka u 2021. godini postupala u skladu sa odredbama Zakona o finansiranju političkih stranaka.**

## 1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je reviziju godišnjeg finansijskog izvještaja Hrvatske republikanske stranke za 2021. godinu.

Revizija je preduzeta u skladu sa članom 10. stav (1) Zakona o finansiranju političkih stranaka, članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka. Zbog činjenice da se revizija obavlja provjerama na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja za 2021. godinu, Hrvatska republikanska stranka se finansirala iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	0,00	0,00
2.	Prilozi fizičkih lica ( 3-a )	745,30	0,61
3.	Prilozi pravnih lica ( 3-b )	600,00	0,49
4.	Prihodi od imovine ( 3-c )	0,00	0,00
5.	Prihodi od dobiti preduzeća u vlasništvu političke stranke ( 3-d )	0,00	0,00
6.	Prihodi od poklona ( 3-e )	0,00	0,00
7.	Prihodi iz budžeta ( 3-f )	119.433,74	97,59
8.	Prihodi od propagande ( 3-g )	0,00	0,00
<b>I</b>	<b>Ukupni prihodi (1-8)</b>	<b>120.779,04</b>	<b>98,69</b>
<b>II</b>	<b>Ostali prihodi i drugo</b>	<b>1.600,00</b>	<b>1,31</b>
	<b>Izvori finansiranja (I+II)</b>	<b>122.379,04</b>	<b>100,00</b>

U godišnjem finansijskom izvještaju za 2021. godinu Hrvatska republikanska stranka iskazala je rashode u ukupnom iznosu od 57.915,59 KM.

## 2. PREDSTAVLJANJE POLITIČKE STRANKE

Naziv političke stranke je Hrvatska republikanska stranka. Skraćeni naziv je HRS.

Hrvatska republikanska stranka je upisana u registar kod Općinskog suda u Mostaru, Rješenjem broj: R/4-14 od 16.05.2014. godine.

Sjedište političke stranke je u Mostaru, Nikole Šubića Zrinskog 13.

Lice ovlašteno za predstavljanje i zastupanje stranke je Slaven Raguž, predsjednik.

Lice ovlašteno za finansijske izvještaje za 2021. godinu je Ana Andrić.

U korigovanom godišnjem finansijskom izvještaju za 2021. godinu Hrvatska republikanska stranka je iskazala sljedeću organizacionu strukturu:

- Hrvatska republikanska stranka u Mostaru,
- Hrvatska republikanska stranka Livno i
- Hrvatska republikanska stranka Grude.

### 3. OPIS REVIZIJE

**Predmet revizije** je godišnji finansijski izvještaj Hrvatske republikanske stranke za 2021. godinu.

**Cilj revizije** je da se na osnovu provedenih revizijskih procedura pribave revizijski dokazi, koji će revizoru omogućiti da izrazi mišljenje o tome da li je Hrvatska republikanska stranka u izvještajnom periodu postupala u skladu sa odredbama Zakona o finansiranju političkih stranaka.

**Obim revizije** finansijskih izvještaja Hrvatske republikanske stranke obuhvata kontrolu finansijske dokumentacije i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

### 4. PRETHODNE KONTROLE I REVIZIJE

Služba za reviziju je izvršila pregled i kontrolu finansijskih izvještaja Hrvatske republikanske stranke u periodu od 2015. do 2020. godine, nakon kojih su izdati izvještaji o pregledu sa mišljenjem revizora, nalazima i preporukama revizije.

Nakon izvršenog pregleda godišnjeg finansijskog izvještaja za 2020. godinu, izdat je Izvještaj o pregledu sa mišljenjem revizora, nalazima revizije i preporukama stranci da finansijska sredstva obezbijeđena za finansiranje stranke koristi u skladu sa programom utroška sredstava, da vodi poslovne knjige u skladu sa računovodstvenim propisima, odnosno da vodi pravilne i pravovremene evidencije o rashodima i obavezama, da sadržaj potvrde o primljenim priložima uskladi sa odredbama člana 6. Pravilnika o godišnjim finansijskim izvještajima političkih stranaka, da finansijske izvještaje koje podnosi Centralnoj izbornoj komisiji Bosne i Hercegovine podnosi i popunjava na način propisan odredbama Pravilnika o godišnjim finansijskim izvještajima političkih stranaka i da u svoj finansijski izvještaj uključi koristi od aktivnosti subjekata koji su na bilo koji način povezani sa političkom strankom ili su pod njenom kontrolom.

#### **Nerealizovane preporuke:**

Na osnovu uočenih nedostataka u godišnjem finansijskom izvještaju za 2021. godinu, utvrđeno je da Hrvatska republikanska stranka nije ispoštovala preporuke.

### 5. NALAZI I PREPORUKE

#### 5.1 NALAZI

#### **a) Hrvatska republikanska stranka nije postupila u skladu sa odredbama člana 4. stav (1) Zakona o finansiranju političkih stranaka<sup>1</sup>.**

Uvidom u godišnji finansijski izvještaj za 2021. godinu utvrđeno je da je Hrvatska republikanska stranka u 2021. godini ostvarila rashode u ukupnom iznosu od 57.915,58 KM.

Programom utroška sredstava za 2021. godinu koji je Centralnoj izbornoj komisiji Bosne i Hercegovine dostavljen uz godišnji finansijski izvještaj za 2020. godinu, Hrvatska republikanska stranka planirala je rashode u ukupnom iznosu od 11.070,00 KM, i to: 1) troškove uredskog materijala u iznosu od 1.000,00 KM; 2) troškove električne energije u iznosu od 600,00 KM; 3) najam prostora u Mostaru i Livnu u iznosu od 7.800,00 KM; 4) troškove telekomunikacija u iznosu od 800,00 KM; 5) troškove vode u iznosu od 70,00 KM; 6) računovodstvene usluge u iznosu od 500,00 KM; i 7) ostale materijalne troškove u iznosu od 300,00 KM.

---

<sup>1</sup> Finansijska sredstva iz člana 3. stav (1) Zakona o finansiranju političkih stranaka, politička stranka može koristiti isključivo za ostvarivanje ciljeva utvrđenim svojim programom i statutom.

Pregledom finansijskog izvještaja i finansijske dokumentacije, utvrđeno je da je politička stranka sredstva utrošila mimo svog Programa utroška sredstava za 2021. godinu, kako slijedi:

- Uvidom u poslovne knjige i finansijski izvještaj, utvrđeno je da je politička stranka ostvarila troškove koji nisu planirani, i to: usluge održavanja, troškove reprezentacije, troškove održavanja domene i grafičke usluge koje je u finansijskom izvještaju iskazala kao troškove stručnog obrazovanja-seminari, troškove ugovora o djelu, troškove reprezentacije, troškove platnog prometa, troškove poreza i drugih obaveza, humanitarne rashode, troškove advokatskih usluga i sudske troškove, troškove revizije i troškove zakupa sala.

U korigovanom godišnjem finansijskom izvještaju stranka je iskazala usluge održavanja u iznosu od 3.274,00 KM, troškove reprezentacije u iznosu od 5.329,97 KM<sup>2</sup>, troškove održavanja domene i grafičke usluge<sup>3</sup> u iznosu od 2.455,03 KM, troškove ugovora o djelu u iznosu od 8.080,00 KM, troškove platnog prometa u iznosu od 689,14 KM, troškove poreza i drugih obaveza u iznosu od 962,38 KM, humanitarne rashode u iznosu od 24.373,80 KM, troškove advokatskih usluga i sudske troškove u iznosu od 1.755,00 KM, ostale troškove u iznosu od 70,00 KM<sup>4</sup> i troškove zakupa sala u iznosu od 100,00 KM, odnosno ukupno 47.089,32 KM.

- Stranka je planirane troškove električne energije prekoračila za 258,00 KM. U Programu utroška sredstava za 2021. godinu stranka je planirala troškove električne energije u iznosu od 600,00 KM, a iste je ostvarila u iznosu od 858,00 KM.

S obzirom da je politička stranka finansijska sredstva u iznosu od 47.347,32 KM utrošila mimo utvrđenog Programa utroška sredstava za 2021. godinu, prekršene su odredbe člana 4. stav (1) Zakona o finansiranju političkih stranaka.

**b) Hrvatska republikanska stranka prekršila je odredbe člana 11. stav (1) i člana 12. stav (1) i stav (4) Zakona o finansiranju političkih stranaka.**

Na osnovu obavljene revizije godišnjeg finansijskog izvještaja za 2021. godinu, utvrđeno je da Hrvatska republikanska stranka nije vodila pravilne i potpune evidencije o rashodima i obavezama, nije postupala u skladu sa računovodstvenim propisima i godišnji finansijski izvještaj nije popunila u skladu sa odredbama Pravilnika o godišnjim finansijskim izvještajima političkih stranaka (u daljem tekstu: Pravilnik), čime je prekršila odredbe člana 11. stav (1) i člana 12. stav (1) i stav (4) Zakona o finansiranju političkih stranaka.

(1) Uvidom u Inventurnu listu na dan 31.12.2021. godine utvrđeno je da je izvršen popis osnovnih sredstava i opreme, ali da nije izvršen popis novčanih sredstava na transakcijskim računima i blagajni, potraživanja i obaveza političke stranke, što je propisano Zakonom o računovodstvu i reviziji Federacije Bosne i Hercegovine i Pravilnikom o računovodstvu političke stranke.

(2) Stranka je u poslovnim knjigama sve rashode evidentirala na nivou političke stranke, kao rashode organizacionog dijela u Mostaru, odnosno nije uspostavila evidencije o troškovima za svaki organizacioni dio pojedinačno.

Takođe, stranka nije uspostavila analitičke evidencije za troškove telefona, knjigovodstvene usluge, advokatske usluge i sl., već je iste knjižila u okviru analitičkog konta 4015-*ostale usluge*, mjesečno, u zbirnom iznosu. Isto tako, stranka je troškove noćenja iskazala u okviru konta 4013-*troškovi za reprezentaciju, reklamu*.

---

<sup>2</sup> U korigovanom obrascu 4.1 godišnjeg finansijskog izvještaja stranka je troškove reprezentacije iskazala u iznosu od 5.332,97 KM, što je za 3,00 KM više u odnosu na ostvarne troškove.

<sup>3</sup> U postupku revizije je utvrđeno da stranka troškove održavanja domene i grafičke usluge u iznosu od 2.455,03 KM u korigovanom obrascu 4.1 godišnjeg finansijskog izvještaja iskazala kao troškove stručnog obrazovanja-seminari.

<sup>4</sup> Stranka je iskazala troškove revizije u iznosu od 70,00 KM.

- (3) Hrvatska republikanska stranka nije u godišnjem finansijskom izvještaju iskazala tačne podatke o rashodima, čime je prekršila odredbe člana 21. i 22. Pravilnika.

-Podaci o troškovima koje je politička stranka iskazala u obrascu 4.1 godišnjeg finansijskog izvještaja ne odgovaraju podacima koje je stranka evidentirala u svojim poslovnim knjigama.

Stranka je troškove u iznosu od 5.637,93 KM koje je evidentirala u poslovnim knjigama na kontu 4015-*ostale usluge* iskazala u obrascu 4.1 u ukupnom iznosu od 5.364,96 KM, kako slijedi: utrošena voda u iznosu od 60,45 KM, troškovi stručnog obrazovanja-seminari u iznosu od 2.455,03 KM, troškovi telefona (fiksni telefoni) u iznosu od 794,48 KM, troškovi knjigovodstvenih usluga u iznosu od 500,00 KM, troškovi advokatskih usluga i sudski troškovi u iznosu od 1.755,00 KM i troškovi revizije u iznosu od 70,00 KM.

Uvidom u analitičke kartice, naloge knjiženja i račune, utvrđeno je sljedeće:

-Troškove održavanja domene i grafičke usluge po računima dobavljača „Visign kreativni studio“ i „Leftor“ u iznosima od 2.367,28 KM i 87,75 KM, odnosno ukupno 2.455,03 KM stranka je iskazala kao troškove stručnog usavršavanja-seminari.

-Uvidom u analitičke kartice i naloge knjiženja utvrđeno je da je stranka račune za električnu energiju za april 2021. godine u ukupnom iznosu od 62,56 KM evidentirala na kontu troškova energije u iznosu od 42,56 KM, dok je 20,00 KM evidentirala kao ostale usluge, čime je podatke o troškovima električne energije i ostalim uslugama iskazala u pogešnom iznosu.

-Prema podacima iz poslovnih knjiga-analitičke kartice obaveza prema dobavljaču „HT Eronet“, troškovi telefonskih usluga iznosili su 777,45 KM, dok je stranka u obrascu 4.1 iskazala troškove telefonskih usluga u iznosu od 794,48 KM.

-Stranka u poslovnim knjigama nije pravilno evidentirala troškove održavanja i troškove reprezentacije. Naime, stranka je u poslovnim knjigama troškove usluga održavanja evidentirala u iznosu od 3.711,00 KM, iako su ovi troškovi iznosili 3.274,00 KM. S druge strane, stranka je troškove reprezentacije evidentirala u iznosu od 4.892,97 KM, a iste je ostvarila u iznosu od 5.329,97 KM. U korigovanom godišnjem finansijskom izvještaju stranka je troškove reprezentacije iskazala u iznosu od 5.332,97 KM

-Hrvatska republikanska stranka nije u svojim poslovnim knjigama evidentirala niti je u godišnjem finansijskom izvještaju iskazala troškove zakupnine poslovnog prostora koji je koristila u Grudama<sup>5</sup> u iznosu od 1.500,00 KM, te je troškove zakupa sale u iznosu od 100,00 KM u obrascu 4.1 pogrešno iskazala kao troškove zakupnine poslovnih prostora.

- (4) Kontrolom isplata ugovora o djelu i donacija fizičkim licima, utvrđeno je da u poslovnim knjigama i godišnjem finansijskom izvještaju nisu iskazani svi troškovi poreza na dohodak i doprinosa i obaveze po istom osnovu, što je suprotno odredbama čl. 21, 22. i 24. Pravilnika.

-Kontrolom isplata ugovora o djelu utvrđeno je da je stranka u toku novembra i decembra 2021. godine isplatila naknade fizičkim licima<sup>6</sup> u ukupnom iznosu od 3.600,00 KM, ali da nije izvršila plaćanje obaveza po osnovu poreza na dohodak i doprinosa u skladu sa poreskim propisima.

<sup>5</sup> U skladu sa Ugovorom o zakupu poslovnog prostora od 14.05.2021. godine, mjesečna zakupnina poslovnog prostora u Grudama iznosila je 200,00 KM, odnosno za period od 15.05.2021. do 31.12.2021. godine 1.500,00 KM. Ugovorom je, takođe, utvrđeno da će stranka izvršiti ulaganje u prostor u iznosu od 2.900,00 KM, te da će se ulaganje smatrati isplatom zakupnine za period od 15.05.2021. godine do 31.07.2021. godine. Uvidom u račune utvrđeno je da je stranka izvršila ulaganje u renoviranje poslovnog prostora koje je obuhvatilo ugradnju keramike po računu dobavljača „Keramika Leko“ broj: 46/12 od 14.05.2021. godine u iznosu od 700,00 KM i nabavku i ugradnju klime inverter i led panela po računu dobavljača „Elektroinstalacije Petar Leko“ broj: 05/21 od 17.05.2021. godine u iznosu od 2.574,00 KM.

<sup>6</sup> Isplaćene su naknade za novembar i decembar 2021. godine.

Stranka u svojim poslovnim knjigama nije evidentirala ni troškove, niti obaveze nastale po navedenom osnovu, tako da iste nije iskazala ni u godišnjem finansijskom izvještaju koji je dostavila Centralnoj izbornoj komisiji Bosne i Hercegovine.

-Uvidom u dokumentaciju, utvrđeno je da je stranka na osnovu pojedinačnih odluka o doniranju novčanih sredstava za studiranje, te Odluke za doniranje novčanih sredstava za gostovanje na tribini isplatila sredstva fizičkim licima u ukupnom iznosu od 1.700,00 KM, te je iste evidentirala na kontu humanitarnih rashoda.

S obzirom da su novčana sredstva isplaćena fizičkim licima, navedene isplate imaju karakter ličnih primanja, na koje je stranka imala obavezu da obračuna i plati porez na dohodak i doprinose u skladu sa poreskim propisima.

Stranka troškove i obaveze po osnovu poreza na dohodak i doprinosa na isplaćena novčana sredstva fizičkim licima nije evidentirala u poslovnim knjigama, niti je iskazala u godišnjem finansijskom izvještaju, čime je prekršila odredbe čl. 21, 22. i 24. Pravilnika.

- (5) Uvidom u finansijsku dokumentaciju političke stranke i knjigovodstvene isprave utvrđeni su nedostaci kod dijela računa dobavljača koji su knjigovodstvene isprave o nastalim poslovnim događajima.<sup>7</sup> Takođe, utvrđeno je da računi nisu ovjereni za knjiženje i plaćanje, iako je članom 6. Pravilnika o računovodstvu Hrvatske republikanske stranke utvrđeno da se kontrola formalne, suštinske i računске ispravnosti knjigovodstvenih isprava potvrđuje potpisom direktora ili lica koje on ovlasti.

-Na računu dobavljača „Restoran San Antonio“ Ružići broj: 29/21 od 20.12.2021. godine u iznosu od 560,00 KM, u dijelu računa u kojem se upisuje naziv artikla ili usluge navedeno je „konzumacija jela i pića“, u količini 1 kom, bez navođenja vrste hrane/pića i količina. Takođe, na računu dobavljača „Villa Milas“ Mostar broj: 9231/2021 od 13.10.2021. godine u ukupnom iznosu od 2.400,00 KM, navedeno je „večera“ u iznosu od 1.920,00 KM, dok je na računu „Gril Green park“ broj: 01-1/21 od 04.06.2021. godine u iznosu od 437,00 KM navedeno „konzumacija jela i pića po fiskalnom računu br“.

-Račun dobavljača „Keramika Leko“ broj: 46/21 od 14.05.2021. godine u iznosu od 700,00 KM ne sadrži potpis odgovornog lica i pečat dobavljača. Stranka u prilogu računa ima fiskalni račun.

-U okviru troškova reprezentacije, stranka je evidentirala i troškove noćenja za više lica koja nisu zaposlena u stranci, dok na računu dobavljača Hotel „Otok“ Grude broj: 01-276/2021 od 20.12.2021. godine nisu navedeni podaci o licu koje je koristilo uslugu noćenja.

- (6) Uvidom u potvrde o primljenim priložima koje je stranka izdala fizičkim i pravnim licima utvrđeno je da potvrde ne sadrže serijski broj potvrde, broj ličnog dokumenta/identifikacioni broj donatora i adresu i mjesto prebivališta/sjedišta donatora, što je suprotno odredbama člana 6. Pravilnika.

U skladu sa odredbama iz člana 6. Pravilnika, politička stranka je dužna svakom fizičkom i pravnom licu od kojeg je primila članarinu ili prilog izdati potvrdu u kojoj su sadržani sljedeći podaci: naziv političke stranke, serijski broj potvrde, ukupan iznos članarine/priloga, ime i prezime/naziv donatora, broj ličnog dokumenta/identifikacioni broj donatora, adresa i mjesto prebivališta/sjedišta donatora, datum uplate, datum izdavanja potvrde i potpis ovlaštenog lica.

---

<sup>7</sup> U skladu sa računovodstvenim propisima, knjigovodstvena isprava mora biti potpuna, istinita, računski tačna i uredna, sačinjena tako da omogućava potpun uvid u vjerodostojnost dokumenta. Sadržaj knjigovodstvene isprave mora nedvojbeno i vjerodostojno pokazivati vrstu i obim nastale promjene (kupovina, količina, cijena, ukupan iznos), karakter poslovne promjene u knjigovodstveno-tehničkom smislu, tehnička obilježja i sl.



## 5.2 PREPORUKE

*Preporučuje se političkoj stranci Hrvatska republikanska stranka da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:*

- *da finansijska sredstva stranke troši u skladu sa programom utroška sredstava,*
- *da vodi poslovne knjige i vrši popis imovine i obaveza u skladu sa računovodstvenim propisima i svojim internim aktima,*
- *da uspostavi pravilne i potpune evidencije o svojim rashodima i obavezama, kao pretpostavku za pravilno finansijsko izvještavanje,*
- *da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka,*
- *da sadržaj potvrde o primljenim priložima uskladi sa odredbama člana 6. Pravilnika o godišnjim finansijskim izvještajima političkih stranaka,*
- *da uspostavi interne kontrole u skladu sa svojim internim aktima i*
- *da poštuje i druge propise, prevashodno poreske.*

### **KOMENTAR:**

U ostavljenom roku, Hrvatska republikanska stranka je dostavila korigovane obrasce godišnjeg finansijskog izvještaja za 2021. godinu, čime je djelimično otklonila nedostatke u popunjavanju finansijskog izvještaja.

Služba za reviziju je uvažila izvršene korekcije na obrascima finansijskog izvještaja, te je u skladu s istim korigovala nalaze revizije iz preliminarnog revizijskog izvještaja.

Zahvaljujemo se ovlaštenom licu za finansijske izvještaje Hrvatske republikanske stranke na dobroj i korektnoj saradnji tokom obavljanja revizije.

Šef Odsjeka za revizijske poslove, revizor

Sanja Tošović

Revizor

Tanja Golijanin

Šef Službe za reviziju

Mr.sc Hasida Gušić